開放文學 - 神鬼仙俠 - 繡雲閣 第一二一回 集群妖大展法術 祭寶劍又復前仇

紫霞曰:「爾諸習道弟子兩旁侍立,聽吾指示於爾。今有靈宅子施下詭計,命諸妖屬隱於萬星臺外十里林中,每到更深煉功之時,前來擾亂道心。以赤鯉、老蛟、毒龍、蝦精為督統。 此四妖者,前受靈宅命為七竅僕役,任其驅使。南龍之剖奇案,海南之平水怪,無一非彼力焉。茲爾三緘折磨七竅、珠蓮,化及四妖形容,絕其所誘,因而夫婦拜在門牆。四妖心甚不甘,又求靈宅予以施妙策。昨夜之擾,只以喊殺為號者,皆靈宅所教也。今日赤鯉等約集妖部於會妖山下,議定今夜與諸子大開殺戒。彼雖不敢想獲全勝,若誅得爾徒一二人,前仇已復。故彼議定兵分五路,四方四隊,皆花精水怪,尚不足畏。至毒龍、赤鯉所率中隊,盡屬虎妖,法術頗多,不可輕鬥。師故來此,與爾等排設停妥。爾等今夜初更時分,概行撤出萬星臺,空著蓬廬,亦分五路,與之對敵。諸子道法高下,三緘諒盡知悉。

師去後,爾即派定。俟群妖入臺,見廬內無人,必以爾等畏彼,聞風遠遁,自然心懈隊亂,陸續退出。爾等於是乘勢攻擊,彼 無準備,定許全勝可獲。然群妖潰敗,不必追逐,可仍歸臺內,各習爾道。今夜如此一戰,已使群妖明白不敢輕視爾等。俟諸異 日,看彼如何做作,為師又來指點。」囑畢,乘風歸去。

三緘拜送後,登臺而坐。遂派翠華、翠蓋、風春,龍女、榴姑、棠英、桃英、紫玉、鳳女、珠蓮、紫花娘、雪青子、了塵子、醋枉道姑、善訣道姑、餐霞道姑、衣雲道姑、回念道姑、從善道姑、弄月道姑、金光道姑為東隊;豁達道人、轉心道人、傳道道人、東心道人、慈祥道人、道烈道人、混元道人、破迷道人、傲性道人、玉白子、石堅子為南隊;盡倫子、盡性子、斂心道人、入道道人、體道道人、習道道人、抱慈道人、護道道人為西隊;知足道人、繡霧道人、蛛虎、蛛龍、善成、化慈、學慈、習慈、統道、用道、昌道、明道、望道、取道、探道、成道、金光道人、西山道人為北隊;三服、棄海、狐疑、狐惑、紫光、樂道、野馬、椒花子、蜻飛子、雲牙道人、火煉道人、剛克道人、柔克道人為中隊。派已,復囑之曰:「爾等毋得造次,必俟群妖退出萬星臺時,方可一擁而進。」諸子領命,齊整法器,思欲各逞本領,以塞妖部窺向之門。

無何,日落西山,鼍更初報。三緘於是與同七竅統得五隊道士,暗暗偷出,隱於臺外。且看群妖候至柝聲三響,妖風駕動,直向萬星臺而來。進得臺中,不見動靜,蓬廬搜遍,人影全無。赤鯉是時以為三緘畏擾,潛逃異地,登在講道臺上,大聲笑曰:「聞得紫霞道法高妙,無人可及。如何所教之三緘,在此呼么喝六,妖部人部,傳道之師。前夜被吾靈宅天仙略施小策,喧鬧一次,恰似畏貓鼠子,深潛土穴而不出乎?今夜吾等特來與爾試試法力,爾三緘野道既居傳道之首,胡弗穩坐在此,與吾妖部一決勝負?妖部如戰爾不過,願竄他所。爾如戰吾不過,此臺須讓妖部坐之。」毒龍假意勸曰:「三緘如在臺內,爾詈之誚之,彼自聆而生愧焉。而今聞吾等威風,業已逃竄他方,何必追究?」蝦精曰:「三緘畏吾妖部,吾恰有以譬之。」老蛟曰:「譬之如何?」蝦精曰:「譬之犬子,一見其主,搖尾乞憐之不暇,焉敢持戈相鬥哉?」老蛟曰:「好,好!

只要三緘深畏吾等,昔日仇恨付之沉淵,速回仙師洞中,將命復後,大排筵宴,以賀功勛。」赤鯉曰:「可惜吾輩空勞一番車駕,絕高道術,未克顯焉。」毒龍曰:「爾等欲顯道法,只管顯之。」於是群妖各現怪像奇形,逞起妖風,摧林折木,飛沙走石,好不驚人。

胡鬧多時,隊伍已亂。剛出萬星臺外,東隊翠華等阻著廝殺,南隊豁達道人等阻著廝殺,西隊盡倫子等阻著廝殺,北隊知足道人等阻著廝殺,中隊三服、樂道等阻著廝殺。群妖措手不及,紛紛亂竄。雖然各顯道術,無如五隊妖部為三緘五隊仙兵衝得七零八落,受傷而逃者甚眾,死於寶器之下者亦多。赤鯉、毒龍、老蛟被棄海、三服圍在山嶺之上,不能脫身,兼之三緘拋起斬妖寶劍,將毒龍輩頭面手足刺了數十下。蝦精又被椒、蜻二子反覆刺以股錐。

正值無可如何,靈宅真人使下遮妖寶幡,救出歸洞。細細查點,群妖受傷者七十有四,為法寶擊斃者三十有五焉。赤鯉、毒龍、老蛟呻吟不絕於口。蝦精在側,泣而怒曰:「因為二三犟頭,橫順要仇復三緘,今被三緘弟子如斯挫辱,悔何及乎?

且爾等受傷即重,皆是法寶所擊,還過得去。惟吾專遇兩位使鐵錐的,連環相刺,吾受了千百錐兒。舉目視之,二人之錐尚且懶於手持,束在股間。若非靈宅仙師寶幡遮著,險被刺死矣。」毒龍曰:「吾等欲報此仇,其念起之已久。今日即敗,傷養好時,又聚妖兵,尋彼師徒拚一死戰。」言已,散去群妖,惟毒龍、蛟、蝦、赤鯉等靈宅洞內將息傷痕。

卻說諸道士大敗妖兵後,仍歸萬星臺。三緘點之,不惟無有死亡,並且寸傷未得。喜而言曰:「正道與妖道相較,妖道真不敵矣。但是以習道之人而啟殺機,原非所可。無如道高魔至,心動欲生,克己工夫不可不講。譬之妖即已也,與鬥即克之。謂不克乎己,則理何能得?爾諸弟子須即妖擾以思道,毋徒作殺機觀也。」諸道士再拜稽首,曰:「曩者師言入道與悟妙道,弟子之輩驟聞之而難通。繼承吾師隨在指點,頃覺無處非道,無時非道以旋轉於目前。此非弟子之善悟,乃吾師之善教也。」三緘曰:「爾等須正心誠意,苦苦向道而求,自然由誠生明,前後可知矣。至於心脈,不可妄動,動則必有外魔擾之。師言如斯,各宜守記。」諸弟子同聲應曰:「謹遵師訓,不敢有違。」三緘曰:「與諸徒講論道旨,功皆不進,但惜一時不能速成,同入繡雲閣內,此道功深遂,未可相強,惟悠游歲月,以待之而已。」又言毒龍四妖日復一日,已將傷痕養好,跪向靈宅,泣而求曰:「弟子等自拜師後,朝日打量,仇復三緘,以羞紫霞面目。無奈計設之累,敗之亦累。此心難了,望師另籌一策,以誅三緘。」靈宅曰:「三緘此際已得九宮八卦之奇,何能誅得?

吾諭爾等將這仇恨付諸流水,乃是上策。如再與鬥,恐難保其靈魂矣。」四妖聞此,大哭不已,固求指一復仇路徑。靈宅子不得已而言曰:「爾等須欲復仇,須將前日群妖概行約集,煉一陣勢,方能勝之。」毒龍曰:「師教弟子所煉何陣?」靈宅曰:「爾將群妖約集來斯,吾自有以教之者。」毒龍等聞言大喜,當即四面與妖寄信。

不上三日,群妖畢至,曰:「今承毒龍諸兄約集吾輩,莫非欲與萬星臺之道士一決勝負乎?」毒龍曰:「非也。靈宅仙真命調爾等,要煉一陣,以誅三緘。爾等來齊,在此候之,自有吩咐。」群妖於是拱立洞外,以候發落。候至次日,靈宅出洞,環顧眾妖而言曰:「爾等欲復三緘之仇,是心真耶,假耶?」群妖應曰:「真耳。」靈宅曰:「既屬真情,莫辭艱苦,吾曾煉一斬仙寶劍,只欠四十九日功以圓足。然必要仙鳳嶺上藏風洞內黑猿血祭之,其劍方靈。此劍靈時,爾等於萬星臺之對面設一穿雲大陣,將劍掛在陣外,入陣者劍自斬之。」言猶未已,毒龍曰:「師以劍殺人,何取陣名為『穿雲』也?」靈宅曰:「是劍也能穿入雲際,誅戮仙子,故以『穿雲』名之耳。」毒龍曰:「此陣如斯厲害,誰人壓之?」靈宅曰:「非師不能壓此陣也。」毒龍喜曰:「吾師壓陣,三緘野道誅之無疑矣,敢辭艱苦乎?」遂與蛟、蝦、赤鯉統領群妖,來至仙鳳嶺藏風洞下,捕捉黑猿。黑猿有一長,已成人形,妖法頗高,非毒龍等所及,見群妖集此,以為同類,亦屬無妨。誰知集了數朝,忽擒一小黑猿而去。